

illam deposcente, propter incolarum ferociam. Procedente deinde tempore, *Ferdinandus Sortus*, Præfecturam hanc à Carolo Imperatore obtinuit, multisque veteranis militibus scriptis, Floridam adnavigavit, anno trigesimo quarto supra millesimum quingentesimum, sed aurariis nimium investigandis intentus, nulla cura urbis deducendæ condendæque, dum per provinciam vagatur, non inventis quas crediderat auri fecturis, mœrore confectus interiit, milites sociique passim à barbaris cæsi & discepti sunt. Succedentibus temporibus, *Galli*, tempore Caroli noni, Duce *Iohanne Ribaldo*, Floridam versus enavigarunt, improspere hac illis cedente navigatione. Alteram æque infaustam navigationem Duce *Landoniero* susceperunt Galli anno 1562 extructa arce Carolina, quæ brevi ab Hispanis occupata fuit. Biennio post *Dominicus Gourgues* comparata classe trium navium, cum centum quinquaginta militibus & 80 nautis ultus Gallorum manes, Carolinam arcem recepit, evertit ac solo æquavit. Sed in reditu cum à rege suo hoc factum iniquo animo accipi intelligeret, quievit, neque ulla amplius Gallorum in Floridam expeditio memoratur, mansitque Hispanis vacua harum terrarum possessio. Provincie celebriores Terræ Floridæ ab Hispanis repectæ, sunt *Panuca* regio, in finibus Hispaniæ Novæ sita, cujus incolæ bellicosi admodum, & in bello crudeles, captivos idolis immolant & comedunt. Viri barbas sibi evellunt, ut speciosiores appareant, nares & aures perforatas habent, nec ante 40 ætatis annum matrimonio junguntur. Hinc *Avanares* regio, & *Albardaofia* provincia, quarum incolæ sunt versutissimi, moribusque à reliquis Indiæ populis differunt. Hi enim per omnes Indiæ regiones noctu bellare non solent: at *Albardaofii* magna præliantur astutia, noctuque bellum gerunt, agrosque devastant: inimicum si perlescant debilem, adoriuntur, sed victum non persequuntur: nec victoria uti norunt. Est quoque in Florida *Iaguazia* regio, cujus incolæ adeo cursu valent, ut cervos superent & capiant, curruntque diem integrum nec fatigantur. Sunt & aliæ regiones & provin-

ciæ terræ Floridæ, ut *Apalachia*, *Autia*, *Somovia*, & aliæ. Regio in universum plurimis rivis fluminibusque irrigua, eoque humidior; & in montibus *Apalchicis* ingentes rivi oriuntur, auri argentique arenas provolventes, quas incolæ ripis per fossas diductis, colligunt, & secundo flumine ad maris littora venales deferunt. Inter flumina præcipua sunt *Porto Real* dictum, quod sonat Portum regium. Ostium fluvii tria milliaria complectitur, habetque duo promontoria, quorum alterum Occidentem, alterum Septentrionem spectat: item *Rio secco*, fl. *Magnus* aut *Grandis*, *Garumna*, *Charenta*, *Ligeris*, *Axona*, *Sequana*, *Ay*, *Serravahi*, *Majus*, & alia. Oram habet satis asperam, ac paucos maris portus, quinetiam mare eam abluens scopulis ac brevibus refertum est. Regio plana est, ac paucos habet montes, in quibus *Apalchici* præcipui. Circa fluvium *Portum regium* multæ sunt silvæ quercubus & cedris confitæ, in quibus cervi plurimi ac feræ, etiam multi pavones Indici reperiebantur. Juventutem exercent cursu, jaculando, & pila. Ingenio vero vafro sunt ac subdolo, ad bellum & vindictam proni. Arma sunt arcus, sagittæ veneno armantur, venationi & piscationibus mirum in modum indulgent. Reges continuis bellis in mutuam perniciem sæviunt. Vescuntur araneis, formicis, lacertis, serpentibus, ceterisque id genus venenatis & insectis. Regis est unicuique uxorem dare, seu vendere potius. Si in adulterio uxor deprehendatur, arbori per diem dorso alligata, exsertis brachiis, & disjunctis cruribus, virgis interdum cæsa, pœnas dat. Mulier, tertia postquam peperit hora, infantem ad amnem lavandum portat. Nulla illis securis vel ligo, nisi lapideus. Vice aratri sunt illis asseres, quibus terram aperiunt. Colore sunt æneo, quem certa inunctione & solis ardore contrahunt, cum tamen recenter nati, satis albi sint. Prorsus nudi incedunt, exceptis senibus ac foeminis, qui cervinis pellibus induuntur. Abundat regio hermaphroditis, quorum servili opera, mancipiorum jumentorumque loco utuntur. Animarum immortalitatem credunt, cætera idololatræ.

Flumina.

Montes.

Silvæ.

Adores.

Victim.

Vestitus.